



საქართველოს მთავრობის განკარგულება

№1038 2018 წლის 10 მაისი ქ. თბილისი

ქ. მცხეთის სივრცით-ტერიტორიული განვითარებისათვის ზოგიერთ
ღონისძიებათა განხორციელების შესახებ

1. „საქართველოს მთავრობის სტრუქტურის, უფლებამოსილებისა და
საქმიანობის წესის შესახებ“ საქართველოს კანონის მე-5 მუხლის „ი“
ქვეპუნქტების საფუძველზე, საქართველოს ეკონომიკისა და მდგრადი
განვითარების, საქართველოს კულტურისა და სპორტის და საქართველოს
რეგიონული განვითარებისა და ინფრასტრუქტურის სამინისტროებმა,
საქართველოს ეკონომიკისა და მდგრადი განვითარების სამინისტროს
სისტემაში შემავალმა სსიპ – სახელმწიფო ქონების ეროვნულმა სააგენტომ და
საქართველოს იუსტიციის სამინისტროს სისტემაში შემავალმა სსიპ – საჯარო
რეესტრის ეროვნულმა სააგენტომ, კანონმდებლობით განსაზღვრული
კომპეტენციის ფარგლებში, უზრუნველყონ ქ. მცხეთის სივრცით-
ტერიტორიული განვითარების მართვის სისტემის ფორმირება ამ
განკარგულების დანართით (დანართი №1) განსაზღვრული ტერიტორიის
საზღვრებში, ამავე განკარგულებით გათვალისწინებული სამუშაოებისა და
ღონისძიებების გატარების გზით.

2. „საქართველოს მთავრობის სტრუქტურის, უფლებამოსილებისა და საქმიანობის წესის შესახებ“ საქართველოს კანონის 29-ე მუხლის პირველი პუნქტის შესაბამისად, ქ. მცხეთის სივრცით-ტერიტორიული განვითარების მართვის სისტემის შემუშავების ხელშეწყობისა და მონიტორინგის მიზნით:

ა) შეიქმნას ქ. მცხეთის სივრცით-ტერიტორიული განვითარების მართვის სისტემის შემუშავების უწყებათაშორისი საბჭო (შემდგომში – საბჭო) შემდეგი შემადგენლობით:

საქართველოს ეკონომიკისა და მდგრადი განვითარების სამინისტროს წარმომადგენელი – საბჭოს თავმჯდომარე;

საქართველოს კულტურისა და სპორტის სამინისტროს წარმომადგენელი;

საქართველოს რეგიონული განვითარებისა და ინფრასტრუქტურის სამინისტროს წარმომადგენელი;

საქართველოს თავდაცვის სამინისტროს წარმომადგენელი;

საქართველოს შინაგან საქმეთა სამინისტროს წარმომადგენელი;

საქართველოს იუსტიციის სამინისტროს წარმომადგენელი;

საქართველოს საგარეო საქმეთა სამინისტროს წარმომადგენელი;

ბ) საბჭოს მუშაობაში მონაწილეობის მიღება ეთხოვოთ:

მცხეთის მაჟორიტარ დეპუტატს საქართველოს პარლამენტიდან;

მცხეთის მუნიციპალიტეტის საკრებულოს წარმომადგენელს;

მცხეთის მუნიციპალიტეტის მერიის წარმომადგენელს;

საქართველოს საპატრიარქოს წარმომადგენელს.

3. დამტკიცდეს თანდართული ქ. მცხეთის სივრცით-ტერიტორიული განვითარების მართვის სისტემის შემუშავების უწყებათაშორისი საბჭოს დებულება (დანართი №2).

4. ქ. მცხეთის სივრცით-ტერიტორიული განვითარების მართვის სისტემის შემუშავების პროცესში პროფესიული კონსულტაციების გაწევის

მიზნით, საქართველოს ეკონომიკისა და მდგრადი განვითარების მინისტრის ბრძანებით შეიქმნას პროფესიული საკონსულტაციო საბჭო.

5. ამ განკარგულების მე-2 და მე-4 პუნქტებით განსაზღვრული საბჭოების უფლებამოსილების ვადა განისაზღვროს არანაკლებ „ქ. მცხეთის მუნიციპალიტეტის კულტურული მემკვიდრეობის დამცავ ზონებში ქალაქთმშენებლობის რეგულირების განსაკუთრებული რეჟიმის ამოქმედების შესახებ“ საქართველოს მთავრობის 2015 წლის 3 აგვისტოს №411 დადგენილების (შემდგომში – №411 დადგენილება) მე-7 მუხლის „ბ“ ქვეპუნქტით განსაზღვრული ვადით.

6. საქართველოს კულტურისა და სპორტის სამინისტროს სისტემაში შემავალმა სსიპ – საქართველოს კულტურული მემკვიდრეობის დაცვის ეროვნულმა სააგენტომ, კომპეტენციის ფარგლებში, უზრუნველყოს ქ. მცხეთის სივრცით-ტერიტორიული განვითარების მართვის სისტემის სამუშაოების №411 დადგენილების მე-7 მუხლის „ა.გ“ ქვეპუნქტით გათვალისწინებულ სამუშაოებთან კოორდინაცია, მაქსიმალური თავსებადობის უზრუნველსაყოფად.


7. მცხეთის მუნიციპალიტეტს ეთხოვოს ამ განკარგულების პირველი პუნქტით განსაზღვრული მართვის სისტემის შემუშავების განხორციელების ხელშეწყობა და მისი დასრულების შემდგომ მიღებული დოკუმენტების დამტკიცება კომპეტენციის ფარგლებში, კანონმდებლობით დადგენილი წესით.

პრემიერ-მინისტრი



გიორგი კვირიკაშვილი

დანართი №1





დანართი №2

**ქ. მცხეთის სივრცით-ტერიტორიული განვითარების მართვის სისტემის
შემუშავების უწყებათაშორისი საბჭოს დებულება**

მუხლი 1. ზოგადი დებულებანი

1. ქ. მცხეთის სივრცით-ტერიტორიული განვითარების მართვის სისტემის შემუშავების უწყებათაშორისი საბჭოს (შემდგომში – საბჭო) მიზანია ქ. მცხეთის სივრცით-ტერიტორიული განვითარების მართვის სისტემის ფორმირების პროცესის დროს შესაბამისი რეკომენდაციების მომზადება და პროცესის ზედამხედველობა.

2. საბჭო თავის საქმიანობაში ხელმძღვანელობს საქართველოს კონსტიტუციით, საქართველოს საერთაშორისო ხელშეკრულებებითა და შეთანხმებებით, საკანონმდებლო და კანონქვემდებარე ნორმატიული აქტებითა და ამ დებულებით.

მუხლი 2. საბჭოს ამოცანები და ფუნქციები

საბჭოს ამოცანები და ფუნქციებია:

ა) ქ. მცხეთის სივრცით-ტერიტორიული განვითარების მართვის სისტემის შემუშავების ხელშეწყობა;

- ბ) ქ. მცხეთის სივრცით-ტერიტორიული განვითარების მართვის სისტემის ფორმირების პროცესის ზედამხედველობა;
- გ) ქ. მცხეთის სივრცით-ტერიტორიული განვითარების მართვის სისტემის ფორმირების პროცესში შესაბამისი რეკომენდაციების მომზადება;
- დ) ქ. მცხეთის სივრცით-ტერიტორიული განვითარების მართვის სისტემის ფორმირების პროცესში წამოჭრილ საკითხებზე შესაბამისი წინადადებების შემუშავება და, საჭიროების შემთხვევაში, უფლებამოსილი ორგანო(ებ)ისთვის წარდგენა;
- ე) საჭიროების შემთხვევაში, კანონმდებლობით დადგენილი წესით, სახელმწიფო ორგანოებიდან და დაწესებულებებიდან საბჭოს საქმიანობისათვის საჭირო ინფორმაციის გამოთხოვა.

მუხლი 3. საბჭოს მუშაობის ორგანიზება

1. საბჭოს წარმოადგენს და ხელმძღვანელობს საბჭოს თავმჯდომარე.
2. საბჭოს თავმჯდომარე ორგანიზებას უწევს საბჭოს მუშაობას, უძლვება საბჭოს სხდომებს.
3. საბჭოს თავმჯდომარის არყოფნის შემთხვევაში, მის ფუნქციებს ასრულებს მისი მოადგილე, რომელსაც თავისი შემადგენლობიდან ირჩევს საბჭო.
4. საბჭოს მდივანი ხელმოსაწერად ამზადებს საბჭოს სხდომის ოქმებს, უგზავნის მას საბჭოს წევრებს, ატყობინებს მათ სხდომის ჩატარების თარიღს და უგზავნის სხდომის დღის წესრიგს.
5. საბჭოს სხდომები, როგორც წესი, იმართება არანაკლებ 3 თვეში ერთხელ.
6. რიგგარეშე სხდომების მოწვევის თაობაზე გადაწყვეტილებას იღებს საბჭოს თავმჯდომარე საკუთარი ინიციატივით ან საბჭოს ერთ-ერთი წევრის (წევრების) წერილობითი თხოვნის საფუძველზე.

7. საბჭო უფლებამოსილია, თუ მას ესწრება საბჭოს არანაკლებ შვიდი წევრი. საბჭოს სხდომაზე გადაწყვეტილება მიიღება დამსწრეთა უბრალო უმრავლესობით. ხმათა თანაბრად გაყოფის შემთხვევაში, გადამწყვეტია საბჭოს თავმჯდომარის ხმა.

8. საბჭოს სხდომები ფორმდება ოქმით, რომელსაც ხელს აწერენ საბჭოს თავმჯდომარე და მდივანი. საბჭოს მდივნის ფუნქციებს ასრულებს საქართველოს ეკონომიკისა და მდგრადი განვითარების სამინისტროს სივრცითი დაგეგმარებისა და სამშენებლო პოლიტიკის დეპარტამენტის თანამშრომელი.

მუხლი 4. საბჭოს სამდივნო

1. საბჭოს საქმიანობის უზრუნველყოფას ახორციელებს კომისიის სამდივნო, რომელიც დაკომპლექტდება საქართველოს ეკონომიკისა და მდგრადი განვითარების სამინისტროს სივრცითი დაგეგმარებისა და სამშენებლო პოლიტიკის დეპარტამენტის თანამშრომლებისაგან.

2. საბჭოს სამდივნო უზრუნველყოფს:

ა) საბჭოს დავალებათა შესრულების მიზნით, კომისიის წევრთა შორის ინფორმაციის გაცვლისა და ურთიერთობის კოორდინაციას;

ბ) საბჭოს სხდომების/შეხვედრების მომზადებას;

გ) საბჭოს მიერ უფლებამოსილებების განხორციელებისთვის საჭირო სხვა საქმიანობის განხორციელებას.